

UVOD

Mnoge zemlje današnjice suočavaju se sa problemom korupcije, koja nije pogubna samo po ekonomski rast država, već je pogubna po društveno zdravlje i dobrobit bilo gdje i bilo kad da se pojavi, bez obzira na stepen razvoja države. Izvještaji o korupciji se svakodnevno umnožavaju. To jasno ukazuje na to da je, uprkos naporima za suzbijanje korupcije, ona u mnogim dijelovima svijeta zapravo u porastu. Izvještaji o korupciji takođe ukazuju i na to da korupcija nije nešto što je isključivo, ili prvenstveno, problem zemalja u razvoju. U tom pogledu situacija u industrijalizovanim zemljama je ozbiljna, a u dobrom dijelu zemalja u razvoju i zemalja u tranziciji ona je kritična. Korupcija udara u srce tržišne privrede, ometajući donošenje odluka i nagrađujući one koji su korumpirani i manipulatore, umjesto one efikasne i produktivne.

Savremena tehnološka kultura dala je prevelik značaj potrošnji i posjedovanju dobara. Lični uspjeh i ugled se sve više mjere materijalnim bogatstvom, a ne doprinosom pojedinca društvenoj zajednici. To našu civilizaciju vodi u gubljenje moralnosti koja se jedino može nadoknaditi obrazovanjem. Moramo probuditi duh građanske dužnosti, naročito kod mladih ljudi. U učionicama i debatnim dvoranama moramo podučavati o građanskoj odgovornosti i njegovati opredjeljenje za ono što je društveno korisno. Materijalno bogatstvo mladima se mora predstaviti kao vrijednost, potrebna, ali sporedna u poređenju sa duhovnim vrijednostima. Društveni kapital mora da nadvlada finansijski kapital, jer kultura koja je okrenuta isključivo gomilanju materijalnog bogatstva predstavlja plodno tlo za bujanje korova korupcije.